



ATASSUT

UKA 2016/14

Mala Høy Koku

09. 11. 2016

2016-imi Nunanut allanut tunngasutigut naalackersuinikkut ingerlatsineq pillugu nassuiaat.

(Inuussutissarsiornermut, Suliffeqarnermut Niuernermit Nunanullu Allanut Naalackersuisoq)

Aallarniutigalugu siullertut ATASSUT sinnerlugu Naalackersuisut 2016-mi Nunanut allanut tunngasutigut naalackersuinikkut ingerlatsineq pillugu kingumut nassuiaammik sukumiisumik saqqummiussinerannut qutsavigissavakka.

ATASSUT-mit taamatut nassuiaammik saqqummiussisoqartarnera assut iluarisimaartarparput, nassuiaatimmi ilusilersorneqarnermikkut takujuminarlunilu atuaruminartuummat, minnerunngitsumillu aamma nunanut allanut tunngasutigut nunatsinni naalackersuinikkut ingerlatsinerup killiffianik erseqqissunik paasissutissiiffiummat. Tamatuttaaq aamma ATASSUT-mit iluarisimaarnarpoq nassuiaammi naalackersuisoqarfiit ataasiakkuutaat ukiup ingerlanerani, nunanut allanut tunngassuteqarsinnaasut suliarisimasai ilanngullugit saqqummersinneqarneri. Tassuunakkut aamma takuneqarsinnaammat qanoq annertutigisumik naalackersuinikkut suliat ingerlanneqartut nunanut allanut attuumassuteqarsinnaasarneri.

Susassaqarfiit tamaasa ATASSUT-mit oqaaseqarfiginngikkaluarlutigit, taamattoq ATASSUT-mit pingaarnersiulluta susassaqarfiit assigiinngitsut nunanut allanut tunngassuteqartut matumani nassuiaatip oqallisigineqarnerani oqaaseqarfigilaassavagut.

Inuussutissarsiorneq aatsitassarsiornerlu

Soorlu arlalinnit ilisimaneqartut ATASSUT naalackersuinikkut suliaqarnermi inuussutissarsiutit inerisarneqartuarnissaat aammalu inuussutissarsiornermi inatsisitigut akileraartarnikkullu sinaakkutissat pitsanngorsaavigineqartuarnissaannik pingaartitsisuuvoq. Taamaattumik aamma ATASSUT-mit nuannaarutigaarput ukiut kingulliit takusinnaagatsigit nunat sanilerisatta

inuussutissarsiuteqarnikkut suleqatigiinnerisa ineriartorluarneri. Ilisimatusarnikkut, silaannakkut angallassinikkut sanaartornikkullu ukiut kingulliit Island-ermit suleqatigineqarlualersimapput.

ATASSUT-miillu qilanaaraarput kalaaliminernik Islandimut eqqussisinnaanermut malittarisassat nutaat suliarineqarlutik naammassineqarnissaat, tassuunakkut aamma nunatsinni inuutissarsiutillit Island-imut tunisassiaminnik tunisinnaanerat annertusarneqarsinnaalluarmat.

ATASSUT-mit ilanngullugu oqaatiginngitsoorusunngilarput nuannaarutigigatsigut nunatsinni Royal Arctic Line A/S-ip Island-imeersut Eimskip-ilu suleqatigiinnissamut isumaqatigiissuteqarsimmata - taamaasilluni aamma siunissami qaninnermi ungasinnerusumillu imaatigut assartuinnermi angallassinermilu inerisaasoqarsinnaaneraniq aqutissiuussilluaqataasinnaassammata - pingaartumik avammut niueqatigiinnermut tunisassiat piaarnerusumik ingerlanneqarsinnaalernissaannik aamma periarfissiisinnaassammat.

Taamaattumik ATASSUT-mit Naalackersuisunut kaammattuutigissavarput nunatta Island-imi sinniisoqarfeqalersinnaaneraniq suliniuteqarnissaq pimoorullugu aallartisalereersinnaagaat, tamannami inuussutissarsiornikkut, ilinniartitaanikkut allatigullumi ineriartortitsisinnaanermut siunissami iluaqatigineqarlualersinnaammat.

Inuussutissarsiutitsigut nunanut allanut tunngasutigut naalackersuinikkut ukiuni kingullerni aalassassutaagaatsiarsimasut ilagivaat amerika-rmiut Pituffimmi kiffartuussinissamut isumaqatigiissutip eqqartuussivikkut suliarineqalersimanera, ATASSUT-miillu qanimut pissangalluta aamma malinnaaffigaarput qanoq eqqartuussisunut annerusunut ingerlateqqinneqarsimanera inerneqarumaarnersoq.

Tuluit Nunaanni EU-miit aninissamut taasititsinerup kinguneraa ukiuni qaninnerni Tuluit Nunaata EU-mut ilaasortaajunnaarnissaa, taamaattumik ATASSUT-mit Naalackersuisut isumaqatigilluinnarpavut nunatsinniit Tuluit Nunaannik suleqateqalersinnaaneq eqqarsaatigalugu eqqumaniarfigineqarlualertariaqartoq, aammalu ATASSUT-mit kaammattuutigissavarput nunatsinniit Tuluit Nunaanni danskit sinniisoqarfianni Washington DC-misuulli sinniisoqalersinnaanermut periarfissanik misissuisoqalereernissaa.

Kangiani inuussutissarsiornikkut niueqatigiinnikkullu suliniutit nassuiaammi saqqummiunneqartut ATASSUT-mit tusaatissatut tiguvagut neriuppugullu ukiut ingerlanerini ineritaqarfiulluarumaartut.

Nunatsinni aatsitassarsiornerup ineriartornera naapertorlugu EITI-mik suliaqarneq atuutsilerneqarsimavoq - nassuiaat naapertorlugu EITI tassaavoq suleqatigiiffik ilaatigut nunani aatsitassanik tunisassiornermi akiliutit ilaatigut naleqqiullugu ammaneruneq paasiuminartuunerunerlu pillugit sulinermi suleqatigiiffiusoq - tassunga tunngatillugu nassuiaammi nalunaarutigineqarpoq Kalaallit EITI-mut qaninnerusumik atalernerata kingunerisaanik misissuisoqarnermit nalunaarusiaq 2016-mi naammassineqassasoq - Naalakkersuisut oqaatigereersinnaanerpaat tamanna qaqugu pissanersoq?

Nunat tamalaat akornanni suleqatigiiffiit pisinnaatitaaffiillu

ATASSUT-mit pingaartilluinnarpavut ukiorpanngortuni nunat inoqqaavisa pisinnaatitaaffiit pillugit suleqatigiiffinni nunatta ilaatigut ICC qanimut peqatigalugu peqataalluarterneri, taamaattumik suli siunissami Naalagaaffiit Peqatigiit (NP) iluanni suleqatigiiffinnut nunatta peqataajuarnissaa pingaaruteqarpoq. NP-mi suleqatigiiffinnut assigiinngitsunut nunatta peqataanera nunat inoqqaavisa pisinnaatitaaffii, allallu pisinnaatitaaffiit soorlu meeqqanut arnanunut il.il. tunngassuteqartut peqataaffigissallugit pingaaruteqarluinnarput - tamakkuummata nunarsuarmioqatigiit akornanni naalakkersuinikkut sinaakkusersuinitisinni najoqqutassiissutissat pingaarnerpaat.

EU aamma OLT

Nunatta EU-mi suleqateqarnera ukiorpassuannngortuni ingerlasimavoq aammalu nunatta Danmark peqatigalugu annertuumik sunniuteqaqataasimapput EU-p Issittumi naalakkersuinikkut ingerlatsineranik EU-p suliarinninneranik, ATASSUT-miillu nuannaarutigaarput tamanna ukioq manna april-imi Joint Declaration-ip atortuulersinneqarneratigut.

ATASSUT-mit pigaartipparput aalisarnikkut, niueqatigiinnikkut, ilisimatusarnikkut aallatigullu qanimut EU-mi nunatta suleqataajuarnissaa. Taamaattumik aamma ATASSUT-mit pinngitsoorusunngilagut Naalakkersuisut periarfissaq manna iluatsillugu apeqqutigissallutigu arlaatigut nunatta annerusumik OLT-imi nunatta nunarsuup immikkoortuinut immikkoortitanit sammisatigut 120-135 mio. DKK-nik tapiiffigineqarsinnaanera qanoq atorluarniarneqarsinnaanersoq oqaatigisinnaaneraat?

Aammalu nunatta suliniutinut Europæiske Investerings Bankimi taarsigassarsinissamut periarfissaqarnera Naalakkersuisut arlaatigut nunatsinniit periarfissaasinnaanera pillugu

inuutissarsiornermik ingerlatsisut peqatigalugit takorluugaqarnerpat? Tassanimi nassuiaat naapertorlugu nunat OLT'eermiut ataatsimoorussamik immikkoortitaqarput 2014-2020-mut atugassat, 750 mio. DKK-nik annertussusilinnik.

Susassaqarfii allat

ATASSUT-mit pingaartippavut nunat tamalaat akornanni suleqatigiiffiit qanimut peqataaffigineqarnerisigut nunatsinni ineriartortitseqataajuarnissamut aqutissaalluarmata, minnerunngitsumillu aamma uagut nunatsinni atugarisatsinnik misilittakkatsinnik aamma nunarsuarmioqativut avitseqatigisinnaagatsigit, tassuunakkut ataqpeqatigiinnikkut ineriartortitsineq pilersinneqartarmat.

Taamaattumik ilinniartitaanikkut meerartatsinnut inuusuttortatsinnullu periarfissarsiuussiuarnissaq sulissutigineqartariaqartut ilaattut ATASSUT-mit tikkuarusupparput - nunat assigiinngitsorpassuit suleqatiserinnittartut atorluartarnissaat pikkoriffiginerusariaqarparput inuusuttortatta nunanut allanut ilinniariarnissamut tapiiffigineqarsinnaaneritut aningaasaateqarfinnut periarfissaannik ammaassisuusinnaasunik aqutissiuussisinnaanermut - taamaattumik manna iluatsillu ATASSUT-mit naggasiullugu Naalackersuisunut tamanna kaammattuutigissavarput annertunerusumik tamanna aalluteqqullugu. Nunattami nukippassuit aningaasallu ikigisassaannigitsut atortarpaat nunanut attaveqatigiinnerit inerisarnissaannut, taamaattumik aamma pikkoriffiginerusariaqarparput inuusuttortatta aqutissiuunneqarnissaannut - uani ilinniakkat qaffasinnerit kisiisa eqqarsaatiginagit, kisiannili aamma oqaatsitigut pikkorissaatigaluni ukiiartortartut aamma pinerullugit.

Taamatut ATASSUT-mit 2016-imi Nunanut allanut tunngasutigut Naalackersuinikkut ingerlatsineq pillugu nassuiaat oqaaseqarfigaarput - kissaappavullu Naalackersuisut naalackersuinikkut aamma nunanut allanut tunngassuteqartutigut sulinertik ingerlalluarumaaraat.

Taamaasilluta ATASSUT-mit nassuiaat tusaatissatut tiguarput.

Qujanaq!